



Komunikado

18 di òktober 2023

Cft: "Apesar di entrada kresiente Kòrsou ta enfrentá retonan grandi"

Willemstad – E añanan benidero Kòrsou ta bai enfrentá gastunan mas haltu komo konsekuensia di e solushon pa ENNIA i e refinansiamentu di sosten di likides. Ademas e riesgonan i inseguridatnan den kuido i seguridat sosial ta keda mésun grandi, i Kòrsou ta pará tambe dilanti di un problema riba tereno di invershon. Den e kòmbersashonnan ku el a hiba resientemente ku gobièrnu di Kòrsou, Kolegio di supervishon finansiero Kòrsou i Sint Maarten (Cft) a pidi atenshon spesial pa e desaroyonan aki. E ekonomia di Kòrsou ta kresiendo, entre otro danki na turismo. Por realisá fortifikashon mas aleu di ekonomia pa medio di invershonnan dirigí. Kumplimento ku deber di paga impuesto (compliance) a mehorá hopi den e último añanan, pero ta nesesario pa ankra esaki den un forma struktural. Mester evitá ku ta sigui posponé introdukshon di e sistema di pèrmit pa e sektor di gambling. Banda di esei reformanan struktural ta nesesario pa mantené kuido i seguridat sosial aksesibel pa futuro generashonnan.

Resientemente gobièrnu di Kòrsou a skohe pa un solushon pa e fail di ENNIA, a base di kua e pais lo hasi e medionan nesesario disponibel pa por realisá un terminashon kontrolá. Cft ta konsiderá ku e solushon aki ta trese ménos riesgo kuné kompará ku un reanudashon di ENNIA. Un fianza supstansial ku lo tabata nesesario den kaso di un reanudashon, lo a trese kuné limitashon di e presupuesto di Kòrsou riba término largu. Komo konsekuensia di esaki posibelmente lo no por a hasi invershon mas den futuro. Awor Kòrsou, den koperashon ku Banko Sentral di Kòrsou i Sint Maarten, lo sigui elaborá e solushon ku a skohe p'e. Kòrsou a yega na un akuerdo ku Hulanda pa un préstamo pa refinansiamentu di e sosten di likides. E nivel di e interes di e fianza aki ta relashoná ku e solushon definitivo ku lo yega na dje pa e kaso ENNIA. Di tur manera ta sigur ku den e próksimo añanan, e gastunan di interes di Kòrsou strukturalmente lo bai ta na un nivel mas haltu.

E kresementu ekonómiko i subida di compliance ta brinda Kòrsou un base pa por karga e gastunan ku ta subiendo. Den 2022 e entradanan di impuesto tabata mas ku 18 porshento riba esnan di 2021 i e espektativanan pa e entradanan di impuesto di 2023 tambe ta positivo. Mester mantené i subi e nivel di entrada mas haltu di impuesto aki. Ta importante pa den 2024 realisá e entradanan di e sistema di pèrmit di e sektor di wega di plaka, manera ta stipulá den presupuesto.

Ya algun bes Cft a indiká ku Kòrsou mester invertí mas den desaroyo ekonómiko di e pais. Ademas di e mehoranan ku ta surgi for di esaki pa e habitantenan di Kòrsou, fortifikashon di ekonomia lo kontribuí na resistensia di finansa públiko. Apesar di e gastunan ku a subi, Kòrsou lo mester krea mas espasio pa invershon riba su presupuesto. Esaki ta posibel si implementá e reformanan struktural. Kòrsou por utilizá mas mihó e oportunidatnan ku e Pakete Nashonal ta brinda pa esaki.

Kuido i seguridat sosial

Kòrsou ta paga di e presupuesto nashonal un kontribushon anual di ANG 305 mion na e fondonan sosial. Pa evitá défisit den e fondonan sosial den 2022 i 2023, e pais a implementá algun medida di maneho eksitoso. Tòg Banko di Seguro Sosial te ainda ta ferwagt défisit struktural den e fondonan sosial (fondo ku ta fluktua – schommelfonds). Kòrsou ta obligá pa balansá e défisitnan aki ku fondonan di e presupuesto



nashonal. Esaki lo bai a kosto di otro gastunan di gobièrnu pa por ehèmpel invershon i enseñansa. Mester implementá reformanan struktural pa por mantené aksesibilidat pa kuido i seguridat sosial pa futuro generashonnan. E situashon finansiero di Curaçao Medical Center ta keda mésun preokupante. Cft pa pidi Kòrsou pa mas urgensia den atendentu di e situashon aki.

[Fin di Komunikado]

Foto:

Nathan Roosberg

Teksto pa foto:

Den 2022 e entradanan di impuesto tabata mas ku 18 porshento riba esnan di 2021 i e espektativanan pa e entradanan di impuesto di 2023 tambe ta positivo.

Nota pa redakshon – no pa publikashon

Kontakto na Cft:

Sekretariado Kolegionan di supervishon finansiero

Telefòn +5999 461-9081 / +5999 461-9082 / +5999 461-9084

Email info@cft.cw

Website www.cft.cw

Persona di kontakto pa prensa:

Jefka Alberto

Telefòn +5999 512-6861